

四庫全書

集部

欽定四庫全書

宛陵集卷三十六

宋 梅堯臣 撰

送方進士遊廬山

長風沙浪屋許大羅剎石齒水下排歷此二險過湓浦  
始見瀑布懸蒼厓繫舟上岸入松徑三日踏穿新蠟鞵  
路盤深谷出嶺望後山日照前山霾偶逢風雨恐衣濕  
側倚石脇人相乖雨收不覺在高處却見童僕提攜偕  
水聲不絕鳥聲好藥草香氣侵人懷老僧避俗去足跣

野客就澗開門闕樹巖隱映見寺剝層層杳杳躋雲階  
塢田將穫鳥雀橫秋果正熟猴猿齧東林澹齋應似舊  
唯此足以待爾儕子心灑落撇然往我方塵垢難磨揩  
讀日者傳答俞生

宋忠為大夫賈誼為博士同與休沐下訪卜長安市吾  
不如二人讀書無舉跬借曰當乘肥乘肥非吾指唯思  
泉石間坐卧松風美

隱靜山懷賢師自持柏栽二十本種於會慶堂

新作齋堂祠畫像又興高閣祕天蹤今朝還藉君移柏

昨日已因鵝種松

近以羣鵝換松植於路傍

九月六日登舟再和潘歙州紙硯

文房四寶出二郡邇來賞愛君與予予傳澄心古紙樣  
君使製之精意餘自茲重詠南堂紙將令世人知首尾  
又得水底碧玉腴溪匠畏持如抱虺拜貺雙珍不可辭  
年衰只怕撇撇鬼

九月十一日下昭亭舟中

平生山野性坐卧愛流水適從昭亭來興自明河起小  
舟浮輕查身入星辰裏飲牛誰家郎照鬢誰家子隔岸  
心相望翻然洲鵲喜灘頭磷磷石欲贈畏指毀留取自  
支機成都無卜士

和張簿寧國山門六題

山門

按碑本軌轍作二軌雙峙作雙壁第六  
句作田外峰巒回抱分陳卑尊當從碑

本

青山中穴為大門下通軌轍高莫論飛雲出納不計限

雙峙平削無刀痕入門復見田園美  
田外峰巒回抱尊  
棲靈畜怪不可詰  
夔魑往往來守閭

紫雲巖

高巖日照雲常起  
吹作蘭花透紋綺  
橫為步障看未收  
山雨一來風滿耳

夕陽巖

日脚射空金縷直  
下映壁間梭未織  
野老先知雨又風  
明朝望比重雲黑

朝陽洞

洞門雖向扶桑開洞深不放陽烏入古來道士今莫逢  
石壁乳流苔正濕

漣漪洞

流泉泱泱出洞底自有細浪非風吹山花逐水到山下  
漏泄人間春未知

碧雲洞

誰將萬古倚雲劍刺破蒼石天窻開下貯泓淵不可極

有時月漏清光來

將離宣城寄吳正仲

吳均詩語多奇  
搗苦倩鴛鴦  
謝明月昭亭川上  
此禽閑為寄  
吳郎吾西發  
西歸千里浮輕舟  
夜觀蟾光逆水流  
水流東海月西海  
各去雖殊意長在  
月偏皎皎隨人行  
水亦汙汙非浪改  
酒盆龍杓閑到吟  
梅花重葉將誰采

湯珙祕校遺沈水管筆一枝

沉香細榦天通中  
束毫為呼諸葛翁  
久從海上厭持握



乞與阮籍書塗窮物珍豈宜賤子有更後應合歸王公  
虛堂淨几塵不到硯傍置架珊瑚紅乃知用遇自有處  
君今莫歎居蒿蓬

樣舟昭亭送都官暫歸錢唐

前枉大梁城詩賦嘉入幕茲對昭亭山將行還有作別  
離此與彼終始情不薄我為解羈馬君乃高飛鶴塵蹄  
未能息健翅懷棲泊尋巢望吳田一傍華亭郭况多丹  
頂雛坐看翔寥廓

依韻公澤察推

君來何所聞君去何所見自古慕虛名往往輕既面竊  
常恃賦稟平直如勁箭是以五十年長甘守貧賤相逢  
嗟未幾遽遠劇飛電今雖行已晚多謝勤相唁

晏成績太祝遺雙井茶五品茶具四枚近詩六  
十篇因以為謝

始於歐陽永叔席乃識雙井絕品茶次逢江東許子春  
又出鷹爪與露芽鷹爪斷之中有光碾成雪色浮乳花

晏公風流丞相族以此五色論等差遠走犀兵至蓬巷  
青筠出篋封題加紋柘冰磁作精具靈味一啜驅昏邪  
神還氣王讀高詠六十五篇金出沙已從鍛鍊出至寶  
終老不變傳幽遐自惟平昔所得者何異瓦礫空盈車  
滌心洗腑彊為答愈苦愈拙徒興嗟

留題開元寺仙上人平雲閣

背市面山色平目觀白雲漁舟溪上歌游客欄邊聞俯  
蒼翠柏瘦蔓籬秋實蕢偶來心意靜塵慮如埽空

送黃生

我本東西南北人窮塗不復淚霑巾亦知車馬有行色  
為見長沮與問津

別張景嵩

我雖識君晚君能知我心我心昭亭水見底無尺尋照  
之不為隱測之不為深魚鰕既混混藻荇亦侵侵終當  
至滄海浴日開黃金君當下灘去石浪激寒音猶能洗  
君目病瞖雲銷岑

別鍾京

我憐鍾氏子冒雨為求文暫以經茲邁與之書所聞野  
鷗窺筆硯舟子采蒿芹況有新炊飯簞漿可送君

江口遇劉紉曹赴鄂州寄張大卿

我同陶淵明遠憶顏光祿得錢留酒家醉卧江蕪綠故  
人已覺身獨賤籬根枯死佳花菊孤鴻飛去鸚鵡洲寄  
聲高樓謝黃鵠使君本是洛陽人嘗憐酩酊銅駝曲休  
將玉笛城上吹武昌老人聽不足已知清音通九霄定

應悔說蘄州竹

送劉紉曹

溪邊前日君辭我江上今朝我送君  
自去蘆洲寄消息故人猶在武昌軍

寄題開元寺明上人院假山

石是青蒼石山非杳藹山諸峰生鏡裏  
小嶺傍池間雨不因雲出門疑為客  
關何須費蠟屐暫到此中閑

寄李獻甫

何言自我去眼前一似空城中豈無人過目猶飛蟲又  
厭塵事多枳棘生胃中安知秋水淨碧如磨銅尚恨  
有世累不及垂釣翁望望當速來止琴視孤鴻

行路難

塗路無不通行貧足如縛輕裘誰家子百金負六博蜀  
道不為難太行不為惡平地之一錢寸步鄰溝壑

題姑蘇豹隱堂

青山崔嵬藏古基文豹不見空斷碑華堂重構猶隱霧

地今易主還好奇欲邀明月一去飲嫦娥將悔出海遲  
谿邊少年意氣在來往只借白鹿騎自稱山人具有酒  
酒酣請我留此辭謫仙墳近何可問當日無詠亦所疑

雨還

雨濛濛兮欲暮路險絕兮深泥嗟予僕兮甚餒畏予馬  
兮顛蹄關已度兮心緩家將至兮涉溪喜膝前兮童穉  
餉燈下兮女妻

哭笑鳥



日月轉入地星辰蔽重雲夜色晦若漆怪禽巢未焚其  
音哭且笑哀樂詎能分方哭且笑時曾莫有以羣哭為  
何所悲笑為何所聞了不預人事吉凶誰復云

山行冒雨至邨家

雨急芹泥滑禽鳴苦竹秋野香生草木雲潤上衣裘入  
石纔通馬穿林忽隱牛山家多淺井下照碧峰頭

八月九日晨興如廁有雅啄蛆

飛鳥先日出誰知彼雌雄豈無腐鼠食來啄穢廁蟲飽

腹上高樹跋觚噪西風吉凶非予聞臭惡在爾躬物靈  
必自絜可以推始終

夜坐

夜久方慮寂空堂燈燭明落葉有暫響暗蟲無停聲力  
學不為己甘貧且徇名聊為詠懷篇還想阮步兵

八月十五夜有懷

天為水蒼玉月柁潭面冰萬里絕瑕玷百丈已澄凝山  
河了然在星斗光莫增借問九州內豈無陰雲興緬懷

去年秋是夜客廣陵太守歐陽公預邀三四朋乃值連  
連雨共飲陳華燈既醉公有詠屬和予未能彊賦石屏  
物固慙無所稱今來宛溪上聊以故歲徵晶明正若此  
霏霖且何曾美景信難并康樂語足憑

題吏隱堂

新堂生虛明未悟追隱吏無乃隱非時唯應喧可避移  
花莫傷根種竹不改翠牀中置素琴亦見陶潛意

詠嚴子陵

不顧萬乘主不屈千戶侯手澄百金魚身被一羊裘借  
問此何耳心遠忘九州青山東寒灘濺浪驚素鷗以之  
為朋親安慕乘華輶老氏輕璧馬莊生惡犧牛終為蘊  
石玉賈古輝巖陬

與潯陽舍弟別

昭亭潭上水下與九江通去客解輕舸落潮乘順風迴  
頭迷遠樹沒背見飛鴻寂寞還蓬巷桓彝宅近東

九月十八日山中見杜鵑花復開

山中泉壑暖幽木寒更華春鳥各噤口游子未還家云  
誰未及還對此重興嗟何必因啼血顏色勝曙霞

記歲

買臣四十八猶苦行負薪我免以樵給貧居年與均道  
上不謳歌妻亦無恚嗔三者固異彼異同雙朱輪

種胡麻

悲哀易衰老鬢忽見二毛苟生亦何樂慈母年且高勉  
力向藥物曲畦聊自薊胡麻養氣血種以督兒曹傍枝

延扶疎脩筵繚索靸霜前未堅好霜後可炮熬誠非騰  
雲術顧此實以勞

達觀禪師曇穎住隱靜蘭若或言自此獼猴散  
走不來穎嘗哂曰吾知是山枇杷為多始至也  
未實故其去將實也必羣集後果然穎惡乎俗  
之好異恐傳以為人惑欲予詠而播之

隱靜山中寺獼猴往往過導師歸以去盧橘熟還多禪  
地寧求愜居人切莫訛未嘗嫌此物任挂古松柯

穎公遺碧霄峰茗

到山春已晚何更有新茶峰頂應多雨天寒始發芽  
採時林狹靜蒸處石泉嘉持作衣囊祕分來五柳家

送達觀禪師歸隱靜寺古律二首

初逢洛陽陌再見南徐州所歷幾何時倏去二十秋  
今復振霜屨還山遠莫留我詠阮公詩物靡必沉浮  
誰云西海魚夜飛東海頭世人嗟識昧豈是滯林邱

栗林霜下熟歸摘禦窮冬帶月涉溪水過山聞寺鐘未

嫌雲衲濕已喜野人逢且莫似杯渡滄波無去蹤

冬至感懷

銜泣想慈顏感物哀不平自古九泉死靡隨新陽生稟  
命異草木彼將漸勾萌人實嗣其世一衰復一榮

冬至日得師厚宋次道中道書

水國欲為雪野冰將合河人同一陽至淚向八行多朋  
意今猶在年華悵似過看看四十九應笑此蹉跎

擬水西寺東峰亭九詠



垂澗藤

澗深連石壁石上生長藤孤猿來自熟緣飲下復登賴  
無樵人迹且免束薪蒸

嶺上雲

我來東峰下遠見西嶺頭白雲忽已合向此偶遲留人  
誰問何有自可忘殷憂

林中翠

萬木總柔翠况復新晴時日色照欲動山氣斂還遲望

之如何攬舉袂隨風吹

棲煙鳥

班班遠林鳥極目波煙中  
各識時早暮不忘巢西東  
惟物得真意吾將效陶公

古壁苔

陰壁流暗泉古苔長自好  
不改春與秋何如路傍草  
空山正幽藹淨綠無人埽

幽徑石

緣溪去欲遠磊砢忽礙行旁臨側身險下忽寒流聲幽  
客慣來往同此猿鳥情

寒溪草

青青色堪染欲辨不知名根陰託乳魚水底抽新萌康  
樂池上詠獨與春夢成

陰厓竹

背嶺斷厓下老竹生扶疎孤根石上引勁節松不如莫  
言霜雪多終見綠有餘

臨軒桂

山楹無惡木但有綠桂叢幽芳尚未歇飛鳥銜殘紅不見離騷人憔悴吟秋風

依韻和達觀禪師還山後見寄

雲歸在高嶺人見是無心矯矯將棲鳥遙遙傍故林南方雖有暖臘月易成陰惟恐多風雪幽期未可尋

九華隱士居陳生寄松管筆

春松抽瘦梗削束費長毫雞距初含潤龍鱗不自韜嘗

為大夫後欲寫伯夷高一獲山家贈令吾媿汝曹

古柳

岸側古大柳誰種臨長江中自出蠹蝨百歲成枯腔忽  
值漲流沒槎牙綴旌幢皮膚藏蛟龍半夜雷砰聲飛霆  
痕尚白如斬馬陵龐倏爾巨電至萬弩聲裂缸又為狂  
風摧所殘惟朽椿卧榦越大鼎絕臚不可扛就爇以照  
漁駭鱗一何厖始知網罟細未足禁突撞隆準以脫去  
城下徒焚降我從洲上泊昏曉睨船窻始終覩變毀欲

賦挑殘釭吾交評韓詩險韻古莫雙安得共詠此但嗟  
各他邦

放鵲并序

烏鵲啄豆于槽圍夫患之以機得鵲其羣噪如救為下  
上突掠甚急知不可脫聲益哀予閱之命釋縛放去因  
為之辭

鵲為禽之靈智兮胡蹈機而不知為庸皂以困束兮固  
性命之將危喜遠人之至止兮始屢驗以如期向何預

覺兮此何自昏豈專心以謀食兮昧目前之禍根苟所  
履必慮患兮莫若去人遠以圖存屑餘秣以致死兮誠  
咎爾而無恥維羣鳴之苦傷兮使吾心之測爾予測孔  
孟兮爾自解則艱皂聽予言兮釋爾而還撫爾呪爾兮  
爾無甚頑後誰恤爾兮拓彈方彎

聞西山虎

猛虎畏白日孤客莫夜行彼以不暴衆此何獨忘生飢  
必見人食不食且無名麋鹿能遠遁安得逢怒獍由人

不由常役役官有程

凍禽

高樹繞吾廬薄暮煙氣重將棲立傍巢已振窺落翫有  
來同拊枝亦各不憚擁颼颼陰風寒夜雪豈無恐

登乾明院碧鮮亭

餘喘不苟盡順俗來飯僧東嶺有上方脩竹蔽孤棧下  
有蒼石案旁挂孤蔓藤擊累向塵世更住殊未能

隱靜遺枇杷



五月枇杷實青青味尚酸獼猴定撩亂欲待熟應難

正月十日五更夢中

今年花似去年新去年人比今年老我勸厚地一杯酒  
收拾白日莫苦早

紅梅

家住寒溪曲梅先雜煖春學妝如小女聚笑發丹脣野  
杏堪同舍山櫻莫與鄰休吹江上笛留伴庾園人

寄文鑒大士

讀書夜寂冷無火捲卷遂成搖膝吟始憶高僧將偈去  
安知古寺託雲深寒塘正睡遠鐘發野鳥亂鳴殘月沈  
明日呼兒整籃輦欲煩重過小溪陰

海棠

江燕入朱閣海棠繁錦條醉生燕玉頰瘦聚楚宮腰曾  
未分香去尤宜著意描誰能共吹笛樹下想前朝

嘗於  
宋宣

獻宅見圖畫明皇於海棠花下  
卧吹簫葉寧王吹笛黃幡綽拍

送餘干李少府

作尉古來清況於于越城舟中雨新足溪上水初生蒼  
獺出還沒素鷗飛且鳴休將五色棒欲取洛陽名

宛陵集卷三十六

欽定四庫全書

宛陵集卷三十七

宋 梅堯臣 撰

與二弟過溪至廣教蘭若

溪上今尚淺涉馬不及羈岸口出近郭野徑通平田行  
行渡小橋沒沒響細泉萬木陰古殿一燈明象筵長廊  
顏頽碑字體家法傳空堂裴相真白顙垂過咽名迹兩  
不滅豈獨畫與鐫高僧鑿崖腹建閣將雲連祕此龍鸞  
迹足使臣僕虔脩竹間長松森衛若被堅是必神物護

禹穴空歲年飯訖過山後井傍攜茗煎探幽偶轉谷忽  
視昭亭巔蔓草不識名步側時得牽幽禽聲各異可辨  
唯杜鵑似驚俗客來聒聒兩耳邊弊廬隔城堞畏暮遽  
言還道逢張羅歸鳥媒兼死懸遂同山梁雉令我復喟  
然聊追一日事書以為短篇

晚坐北軒望昭亭山

少客南京間熟游嵩與華歸來宛溪上厭往昭亭下何  
以厭昭亭衰遲倦驅駕况復慙詠歌嘉辭前有謝咀嚼

在人口甘美如食蔗方同陶淵明苦語近田舍節行固  
不變出處亦多怕常防惡少年豪橫使出胯譬如故將  
軍尚被亭長罵不若守弊廬讀書至中夜

與諸弟及李少府訪廣教文鑒師

山僧邀我輩置酒比陶潛紫葢老堪食青梅酸不嫌野  
蜂時入座巖鳥或窺檐薄暮未能去前溪月似鎌

至廣教因尋古石盆寺

古寺近田家山尋石益差化蟲懸縊女啼鵲響縑車僧

坐樹間石馬行溪畔沙野香無處辨歸路傍城斜

郡人不知

古石盆寺在此山之傍舊基存焉山中有井相去可一里豈圖經所傳裴休井歟近城有石盆寺其側亦云裴相井者恐非是何則杜牧有石盆山詩是寺因山名也從近城莫究其由呼盆為盆必風俗訛也

觀王介夫蒙亭記因寄題蒙亭

吾年將五十尚未暇讀易一聞蒙亭說乃見適所適維時明進退豈不在泉石野服製升越山庖盛雞醢牀頭龍脣琴案上科斗籍風物稍佳時把酒會三益況以兄為郎仕也人豈迫重之愛之深自匪逢時客

亢陽和欲行舟者

春秋書閔雨乃見先王制有意在黎民山川無不祭今  
者望雲霓青天絕纖翳為壇割舒鴈盤血陳水汭于時  
頗精虔奠爵必親洗向夕有微陰埽然還復霽吾聞先  
儒言陽驕不能閉此時繫穹旻已力安所詣宣王雲漢  
詩曾不鑒上帝恨無晷盪舟空自思躍蛟

黃鶯二首

內家初上翠微宮樹裏窺人在半空笑語漸高無約束



侍臣偷望向雲中

西鄰少年今出遊東家女兒未識羞  
門前烏白葉已暗日暮問誰牆上頭

送懷賢上人歸隱靜兼寄達觀禪師

適從山中來復向山中去為報山中人  
莫厭山中住近城塵土多亂爾煙霞趣  
野蜂銜漆汁尚欲為蒂固息此可以安  
其能忘我諭

送瑞竹長老歸當塗因寄徐著作

謝傳青山路春來蔓草生樵蘇猶不入鉅錫莫能行朝

上野船去宿逢溪雨鳴多應見康樂曾重遠公名

和師承嗣

達觀徐君頗稱之

鶯

桑間小婦好聲音映葉穿枝意已深盡日呼郎郎不應  
蕭蕭風雨到前林

守宮

嘗聞漢武帝偶問東方朔臣擬作龍呼慙無頭上角

夏園

夏園甘果熟日覺樹林稀  
休笑道傍李無人摘自肥

孔子廟震

宣城

霹靂下虛殿破楹非夢凶  
昔嘗瞻畫衮今實見升龍  
隱雷聲散疎疎霧氣從予知  
仲尼廟不是蓄乖慵

寄酬睦州晏殿丞

渚潭吐明月杳杳及吾廬  
流彩滿懷袖託情非鳥魚  
朝因南澗雨暮入北畦鉏  
豈不藉餘潤况茲方飯蔬

李仲求寄建溪洪井茶七品云愈少愈佳未知  
嘗何如耳因條而荅之

忽有西山使始遺七品茶末品無水暈六品無沈祖五  
品散雲脚四品浮粟花三品若瓊乳二品罕所加絕品  
不可議甘香焉等差一日嘗一甌六腑無昏邪夜枕不  
得寐月樹聞啼雅憂來唯覺衰可驗唯齒牙動搖有三  
四妨咀連左車髮亦足驚疎疎點霜華乃思平生游  
但恨江路賒安得一見之煮泉相與誇

送闕令之潭州寧鄉

秋風逆水急挂席飛鳥輕三江去雖遠一日行幾程朝  
辭洞庭岸暮抵巴陵城長沙古建國地狹賦薄征邑宰  
愛民者選薦豈非精既曰處民上固當知民情民居望  
竹間山獠相雜并教道苟未至毫髮心起爭太剛易斷  
折太柔難措撐脊在得中道於焉無近名聞多不祥鳥  
似鵝何足驚遠方此為常慎勿心屏營賈誼度湘水為  
文弔屈平因君寄杯酒為我酌賈生

乾明院碧鮮亭

壞衣削髮遠塵垢蛇祖龍孫生屋後不等渭川千戶侯  
尺椽片瓦何嘗有方丈東頭一畝餘中軒四面無窻牖  
青瓊作枝鈿為葉丹鳳未食蒼鼠走細藤織榻白晝眠  
寢濃鼻息如雷吼世間百事不歷心門外寒流徹溪口

得餘干李尉書錄示唐人于越亭詩因以寄題  
餘水之干越之鄙築基相對琵琶尾琵琶日日有秋聲  
鴈過洞庭風入葦南斗憂湖波不起長刀刺峰碧耳耳

姱娥夜出在寒溪青銅瑩磨光幾里朝因吳客幅蒲輕  
滿紙如蠶書可喜

南軒盆植重臺蓮移種池

彤雲赤霧生緒房朝霞變蕊朱粉光白玉入泥不滿盎  
羽蓋裛露明月璫濁水一石亂鼃黿鑿池五丈如斗方  
萍根科斗得自在荷芰明年出水央

朝天行

大車高蓋徐方來天子雙日延英開屏鞞踏玉陞東陞

從臣賜對論宮市諫官御史如指排捧土未能障濁水  
大夫言幹天關迴黃門白望顏色死始時暴奪何縱橫  
有貨晝日不敢行他時五方蛇當酒誰道張郎臨井口

會勝院沃洲亭

前溪夾洲後溪闊風吹細浪龍鱗活孤亭一入野氣深  
松上藤蘿籬上葛葛花葛蔓無斷時女蘿莫翦連古枝  
當年吾叔讀書處夜夜濕螢來復去

江南雜感



樹頭巧婦棲樹下秋蟲織壞衣游子心千里嘗相憶蕩  
子脚出門便作浮萍根憂來憑五兆拜樹賽黃豚

依韻和達觀師山中見寄

殯豕在塗龍在澤豺狼食肉麝食柏蹄毛與角不對齒  
啄腎兩足副以翮既能閑閑住深谷豈使于于佩鳴玉  
水邊看虹山雨霽夜與明月歸獨宿門前重嶺後羣峰  
石樓朱殿藏林中銅絲緊轉轆轤響絡緯秋老號西風  
榮利澹薄無易此彼飲甘醲茲飲水暫將分別向喉舌

何異聲色亂眼耳孔孟久沒言可師千古布散葉與枝  
今來閉戶自有趣世上沄沄非我為

送萬諤昌秀才

志士不戀家安能坐咬咀儒冠難徒行馬骨瘦可數後  
僕隔山陂前林遇風雨寒邨夜宿時寂默誰對語

訪石子澗外兄林亭

前日秋水漲昨日秋水落偶來尋隱居曾未乖宿諾竹  
底餘舊徑藤蔓繫新約馬留岸傍樹風埽林下籜既能

置魯酒又復餉楚餽誰知北南澗照影似清洛平生愛  
幽曠斂迹誠非錯

和端式上人十詠

幽谷泉

幽谷有飛泉入溪知幾里跳珠濺木葉激雨霏巖趾但  
無箕潁人曾不令洗耳

古木陰

古木少直枝其下多曲影豈不愛高陰奈此性所秉千

重葉蒼翳誰願憩日永

寒溪石

翠聳寒溪上半隱寒松下  
水鳥立稜角淵魚游穴罅  
尋常置庭檻瑣細不知價

孤汀蘋

瀟湘歸去人正值江南春  
始願逢拾羽今乃見採蘋  
寄語柳使君莫恨日已曛

雲際鐘

煙昏青櫟道風急隔溪鐘征馬未及息猛虎前有蹤尋  
聲欲投宿僮僕畏所逢

垂崖鞭

崖竹出石壁根瘦懸青蛇磔顙露老節斫骨點寒花少  
年莫翦去騎殺白鼻騮

天外峰

天外一尺峰國中千仞岳重雲不掩蔽萬里見頭角世  
人看遠碧誰識產美璞

秋原菊

不為潭上英不助籬邊醉  
獨占蘭杞鄰原頭自榮悴  
陶令與太鑿逢人豈無意

漁舟火

蘆洲一點明知有漁人  
泊江溟杳不分誰方在高閣  
是時孤鴈去應認光中落

春溪冰

春水冰欲開傍岸已微釋  
魚寒未動鱗獸渡時有迹  
篇

師畏割舟鼓拉碎圭璧

十月二十一日得許昌晏相公書

哀憂向二年朋戚誰與書敢意大丞相尺題傳義廬從  
來鳳皇鳴不厭寒竹疎茂林多翔鳥要路盛高車窮巷  
一如此江深無鯉魚

訪施八評事

施兄今七十近郭隱茅廬嬾問齊民術喜看莊叟書竹  
間鳴澗水原際見邨墟識盡窮通理超然樂有餘

贈陳無逸秀才

良犬不取鼠其人苦尤之近識固未辨善相又能知在  
鹿忘守穴控足乃馬而士有志功名局縮秉書詩憔悴  
未得展磬折忽言卑舉酒一以贈願無羞爾為

題陳宰戲綵亭

仕宦固已美及親此其難況慕五綵戲而奉興居安翁  
喜君亦喜翁餐君亦餐磬磬園中禽口哺心違九邑大  
歲幸稔衆賴仁政寬還思彼赤子如恐君不歡



永慶僧舍松風亭

雖按黃金徽滿指清風度但聽松上聲不知松間趣野  
僧何所樂樂此數株樹寧邀俗客來草綠澗西路

寄松林長老

大松五丈百歲餘小松五尺前時種俱有堅完不朽心  
莫以今輕古為重東溪一片寒玉光夜挂高枝何所用  
題松林院

靜遂無塵地青熒續燄燈木魚傳飯鼓山衲見歸僧野

色寒多霧溪痕夜閣冰吾非謝康樂獨往亦何能

永州守王公慥寄九巖亭記云此地疑是柳子  
厚所說萬石亭也因為二百言以荅願當留詠

天地磨今古賢愚為埃塵草樹易變改山川無故新  
言零陵守白髮駕朱輪間來問遺老俯迹哀昔人昔人  
者誰歟元和前放臣下上窮幽荒憔悴楚水濱試觀當  
此記圖寫未必真最苦來黃溪坐石數游鱗有鳥大如  
鵠東向立不跋始買鉅錡潭鄩杜難計緡冉溪袁家洞

亂石多磷磷深里與沸白若盡無窮津石渠連巖泓  
蒲被其根窮勝得其詭衆美誰齊均西澗石為底豈無  
片與蘋澗崖如堂席澗響如龍脣折竹埽陳葉羅榻同  
衆賓其言粲星斗百歲猶比晨萬石乃淺近尚可資覆  
巾而況前所說但恐煩鐫珉

潘樂二君對雪寄聲似欲予賦適方知之走筆  
奉呈

南方今見雪北客定思家任凍不欺酒競春先著花樓

高休厭上山近未應遮誰問窮居日西窗壓竹斜

過永慶院

荒涼舊蘭若古屋兩三重庭下已無柏澗邊唯有松石  
階生薜荔香座鼓芙蓉化俗似禪衲破來縫不縫

雪中廖宣城寄酒

輕舟泛泛昭亭灣春雪漫漫昭亭山寒沙曲渚杳不辨  
素鷗翔鷺空中還宣城太守閔窮旅雙壺貯醞兵吏頒  
任從六花壅船戶滿酌春色生衰顏醒時但愛雲水好

醉後但與天地閑  
世間取樂必有分  
何必舞娥尚髻鬟  
翠竹亭

種竹幾千个  
結亭三四椽  
遊人多寂靜  
啼鳥亦留連  
酒有陶公愛  
林希阮氏賢  
我來歸路遠  
躍馬古城邊

彩霓亭

高出嶺頭樹  
俯窺城下溪  
半山飛急雨  
舉手弄晴霓  
曠望已無極  
萬緣都與齊  
自嗟來獨晚  
征櫂苦言西

留別樂和之

雪消潭水綠輕舸下灘時漸轉青山去還將故國辭野  
林看欲動江燕欲逢遲吾語隨州體余慙晚始知

松風亭

冉冉竹連澗森森松蔭崖始聞清吹度似欲綠琴諧莫  
識主人意休論高士懷春城百花發薜荔上陰階

雪中懷廣教真人

蒼山關不遠日日起寒雲堂上看飛雪水邊思練裙銅  
餅生薄凍桂火壓殘薰欲往有餘興林幽路不分

下赤山嶺過渡至石子澗別施八評事

三歲守廬次兩迴來澗邊臨塘愛魚樂近竹見人賢  
今我西歸日逢君小隱年重將車馬去驚起野鷗眠

春日拜龍經田家

田家春作日日近丹杏破顰場圃頭南嶺禽過北嶺叫  
高田水入低田流桑芽將綻霧露裛蠶子未浴箱篚收  
令我還朝固不遠紫宸已夢瞻珠旒

將行賽昭亭祠喜雨

未生潭上雲空望山中雨湛湛陳桂樽坎坎奏鼉鼓蕭  
蕭靈風來蹲蹲祝郎舞莫言春作遲但念寒灘阻何當  
發泉源綠水浸沙渚不與農者期自將舟人語定作榜  
歌行暮投丹湖浦瞻祠草樹失認嶺煙霞吐平吞東南  
吳遠帶西北楚川澤見坡陀龍蛇蹙鱗脊人經興寤歎  
事往成前古考碑何驗今塗馬立空廡余知骨相貧豈  
敢望冥許願乘溪流深滂沛隨徹俎

若訥上人彈琴



祥哀已踰月遇子彈鳴琴安得不成聲子心異吾心十  
日成笙歌尼父非好音先王禮有節不可過於今莫作  
風入松懷壟情未任一聞流水曲歸思在溪陰此焉吾  
所樂目極送歸禽

發昭亭

二月十三日

春泥深一尺車馬重重迹親舊各還城山川空向夕今  
朝水平岸不畏舟礙磧始隨湍漲發已入青蒼壁落日  
未逢人孤邨望來客泱泱漫田流青青被壟麥欲霽鳩

亂鳴將耕杏先白我無農畝懃千里事行役寄謝昭亭  
神果不吝深澤

乘小舟訪松山法聰上人

我從溪口來正值山前雨濕衣逢梵宮有僧善吳語天  
寒蜜已空軒靜竹可數歸楫難久留汀鷗自飛舞

過鴈洲

六言

船從鴈洲北去鴈背春風亦歸但見平沙綠水蘆蒿荻  
筍方肥

別達觀文鑒二大士

雲衲山中來，畫橈江上發。何日到山中，山花應未歇。

依韻和文鑒師贈

來見寒沙鳥，長隨上下波。乃知游宦迹，不似施松蘿。子  
語馬喻馬，吾吟柯伐柯。清江挂帆去，奈憶故山何。

宛陵集卷三十七

欽定四庫全書

集部

宛陵集卷

三十八至  
四十

詳校官庶吉士臣張漣

檢討臣何思鈞覆勘

覆校官博士臣劉光第

校對官主簿臣汪日贊

謄錄舉人臣張光熙

欽定四庫全書

宛陵集卷三十八

宋 梅堯臣 撰

贈袁大監

人以祿為榮當知身所重祿榮身且勞豈要權衡用達  
人唯止足曷顧百鍾俸今朝西山歸芝朮不須種莊生  
逸老言此必久已誦矩法況自持推年心可縱

依韻和達觀禪師贈別

平生少壯日百事牽於情今年輒五十所向唯直誠既

不慕富貴亦不防巧傾寧為目前利寧愛身後名文史  
玩朝夕操行蹈賢英下不以傲接上不以意迎衆人欣  
立異此心常自平譬如先後花結實秋共成趙壹雖空  
囊鄭子豈其卿二人貧且隱高譽動天京我蹟固尚賤  
我道未嘗輕力遵仁義塗曷畏萬里程安能苟榮祿擾  
擾復營營近因喪已除偶得存餘生彊欲活妻子勉焉  
事徂征徂征江浦上鷗鳥莫相驚

蕪湖阻風

春風任惡花自笑白浪不愁頭已白  
戢戢大船江浦邊  
崐崙五兩誰非客

次韻和達觀文鑒雨中見懷

出浦候波平石尤風未止密雨長  
蒲牙輕風隨燕子寒  
侵遠客衣岸起新痕水各各欲還  
山還山能幾里

讀月石屏詩

自此起皇祐三年五月至京後

余觀二人作詩論月石月在天上石在山下  
安得石上有月蹟至矣歐陽公知不可詰不  
竟述欲使來者默自

釋蘇子苦豪邁何用彊引犀角蚌蛤巧擗析犀蛤動活  
有情想石無情想已非的吾謂此石之蹟雖似月不能  
行天成紀歷曾無纖毫光不若燈照夕徒為頑璞一片  
圓溫潤又不似圭璧乃有桂樹獨扶疎嫦娥玉兔了莫  
覓無此等物豈可靈祇以為屏安足惜惜吾嗟才薄不復  
詠略評二詩庶有益

暴雨

雲薄風隨雨點麤日腥土氣隨吸呼蒸然襲汗猶揮珠



屋瓦裂響波生渠森森斗覺涼侵膚毛根癢痒粟匝軀  
已知燠寒變須臾雷電不止投笑壺槐端滿影日向晡  
馬蹄莫惜行泥塗

和宋中道喜至次用其韻

予從江南來見子東浦榛問子何不治子兄游洛瀕子  
素樂文字而復養慈親去年始陞朝差差陪縉紳今也  
與吾肩行立笑語頻未經鬢髮改喜預班綴新思如曩  
時會浩飲不計巡往謁持約史文辭媿彬彬謂將一乘

粟欲敵千箱困然而澤中蛇時得龍一鱗况復周孔教  
幸逢舜禹辰又究志所之茲學豈不臻誰其起予者視  
子為席珍趨韓亦已工比孟猶欠淳慎勿驚怪奇怪奇  
世多擯吾慙遼東豕未見西狩麟汨汨塵泥間曷辨玉  
與珉昨來忽有知所索非所循使焉轉磨衡安得目不  
瞬誠聞苑囿美難遣麋鹿馴自惟體衰忝寧堪事艱辛  
宜收蹭蹬迹却返江湖濱浸脰水活活漫灘石磷磷垂  
釣紅鬚登舉袂白羽振以此全吾性胡能往問津非同

子少年柯葉正蓁蓁

齊國大長公主挽詞二首

賢行聞當世尊隆異故常每令夫結友不為子求郎夜  
月初沈海姑星忽隕潢臨門親祖祭悲吹起脩岡

魯館當年盛秦臺此日遙龍歸終合劍鳳去不聞簫挽  
曲方傳薤行輒競奠椒空餘漢官屬泣送馬如潮

招隱堂寄題樂郎中

日哦招隱詩日誦歸田賦未嘗見芸人勇拋冠冕去今

聞緱山陰身退效疏傳  
一旦從犢車歡言友田父復來  
釣澗邊誰問袁公路

貸米於如晦

舉家鳴鵝鴈突冷無晨炊  
大貧凶小貧安能不相嗤  
幸存顏氏帖况有陶公詩  
乞米與乞食皆是前人為

送渭州劉太保

月黑見旄頭芒角漸西向  
八月邊草黃龍庭馬初壯無  
奈我兵雄方為漢偏將  
嘗聞登壇人亦未免得喪得為

凱歌還鏡鼓喧亭障千蹄使椎牛百甕令設醯醢乃軍  
之羞節制由處上進退從其呼何能求必當二事非已  
專願思古挾纊

送張推官洞赴晏相公辟

送子居大梁關中乃關外往者邊事繁秦民被災害今  
聞獨豐穰逮堠無動旂相公欲勤勞請以臨都會多選  
天下才佐佑如何賴決疑有全策何必用著蔡雖病君  
彊行寶刀仍喜帶豈是為俗儒空言事夸大

送張著作器宰蘄水

予聞楚山竹肉好髮亦勻隴上風雪飽石根莓苔皴  
林翦橫吹龍子愁水濱作邑尚簡易豈必蹈昔人願為  
季長賦安用瑤與珉

和癭杯

物以美好稱或以醜惡用美惡固無然逢時乃亦共弃  
則為所輕用則為所重道聞癭木器愛賞互歌頌定應  
初得之買不論官俸醕面生光輝貯飲發狂縱坐欲置

於傍行欲挈以從其形何險怪曾不因藝種凹凸本自然出縮非鬪縫薄才難究窮詆訶茲實恐

太廟致齋荅韓舍人簡

齋舍隔牆東蕭蕭槐樹風聲顏雖不接翰墨遽能通未說涼堪飲唯愁賦少工此焉知素拙試與問楊雄

送張著作孟侯宰上元

天衢車馬迹急若機上梭義雖平生篤不越一再過夫子累顧我言歸泛長河得邑美建業風流猶可歌依稀

江令宅秋草應更多五題誰復詠鍾蔣與嵯峨

劉原甫觀相國寺淨土楊惠之塑像吳道子畫  
又越僧鼓琴閩僧寫真予解其說

吾儕來都下將逾三十春不聞此畫塑想子得亦新茲  
寺臨大道常多車馬塵設如前日手晦昧已惑人曷分  
今與古曷辯偽與真閩緇圖鳳姿越釋彈龍脣但知五  
彩爛徒謂五音淳孰識商聲高孰驚眸子神不能評譜  
品索玉翻得珉二君才調高言若羽翮振將令尋常工



千歲傳不泯

依韻和裴如晦秋懷

老葉已足蠹風振猶在柯  
高高低低聲切切感我多  
不念四散飛火圓競相磨  
當茲思再春宛然同俟河  
莫驚衡山鴈莫問洞庭波  
徒聞漢武帝獨有橫汾歌

送張諷寺丞赴青州幕

朝廷久清明賢相出賢牧  
賢牧又選賢森森備官屬  
是以邦政脩良農播嘉穀  
上無租賦逋下有困廩蓄  
往者

河朔飢奔送劇鳧驚富公鎮青社有來咸鞠育病者調藥劑起者飼饘粥老穉四十萬瘦骨生壯肉鄉縣將遣歸田園皆可復為之置長犁為之置黃犢既完身上衣又付橐中粟庭下再拜辭望城皆感哭他人守一方境內猶不足至今趙魏間食飲常酹祝富公離山東寇盜頗任觸堂堂高平公德業人所伏幕府得才謀螻蟻不勞撲上體憂勤心埽滅得神速張侯三十餘瑩若無玷玉八字分濃脣純漆點雙目昨日奉辟書氣貌寧近俗

言從必磊落事果無出縮他時為書功誰惜千毫禿

送徐祕校廬州監酒

淮南秋物盛稻熟蟹正肥況身為酒官醇酎飲不非儻  
觀衆人醉徒自使世譏與君伯氏好試以此言歸

韓子華江南安撫

韓侯出持節志在撫黔黎縣官負弩迎刺使躍馬隨千  
里宣德澤煦如春風馳寒潮不起浪怙怙威馮夷借問  
何致耳試聽將所為立車呼父老勞以衰矜詞我從大

明宮天子親諭之憂汝歲屢凶吏不恤汝疲已輸又索  
糴困索無了遺此非陛下意恐使汝輩疑疾苦汝告我  
不憚為汝治父老必喜拜如餒得飼麋我稱此大是一  
一無不宜南方二十州歡聲無幼耆壺漿擁大道婦女  
闖短籬行聞江漢間復有宣王詩

周仲章通判潤州

昔過京口山斷崖如輦浴抱谷黃芹泥百丈聳垠嶸山  
嶺無江面地脈水可度欲鑿無淺泉孰云南土薄君為

別乘去便比北州樂已免卑濕憂仍離鵝鵬惡况逢休  
明時秋堞罷嚴柝夜愛寒江潮月臨甘露閣置酒發浩  
歌萬里波欲却霜蟹肥可釣水鱗活堪斫縱飲不須休  
未應滄海涸終當笑揚雄窮壁常寂莫更知首陽人薇  
蕨事亦錯不若阮步兵醉鞍伸兩脚太守必吾徒儻能  
時就酌

弟著作宰南陵

新買紫騮馬欲歸清弋江去彈琴鴈獨來認烏鳬雙橐

實收盈筐濃醅熟滿缸弟兄相憶否風燭舊西窗

和江鄰幾有菊無酒

種菊將飲酒菊開酒無有雖不負爾目且已負爾口昨  
日三四人澹坐飢腹吼徒與哦其傍誰能置升斗當時  
陶淵明籬下望亦久幸賴白衣人不媿采盈手悠然事  
頗同必竟醉則否

五知堂

代人與  
任少傅

履道坊中白家宅五橋莊北晉公堂昔年二老曾相樂

今日五知名獨光舉事是非都不問接花時節暫能忙  
清尊雅曲易為厭自有圖書列在傍

贈陳孝子庸

康州水邊龍母墳草樹蒙蒙起風雨五色五蛇時往來  
野鼠不穴墳上土嗟哉異類猶厚親豈彼人兮忘恃怙  
果生陳子孝且仁終日劬劬在民伍天清天順感其和  
嘉禾駢枝立如股遐鄉歎慕為爾鄰太守欣言出吾部  
中州士人傳以夸照頑燥孽良有補唯時火德君道明

粵南祝融孝所生若然寧獨一陳生築堠表廬從此數  
和原甫同鄰幾過相國寺淨土院因觀楊惠之  
塑吳道子畫聽越僧琴閩僧寫宋賈二公真

青槐夾馳道方轡下麒麟竭來游紺宇歷玩同逡巡吳  
畫與楊塑在昔稱絕倫深殿留舊迹鮮逢真賞人一見  
如宿遇舉袂自拂塵金碧發光彩物象生精神歲月雖  
已深奇妙不媿新驚嗟豈無意振播還有因乃知至精  
手安得久晦堙二僧感識別請以已藝陳或彈中散曲



或出丞相真覽古仍獲今未枉停車輪

李端明宅花燭席上賦

百兩禮將陳王家集上賓花光濃照席燭豔暖迴春已  
接冰壺潤寧辭翠斚醇自慙持短調重對玉堂人

送李祠部知滑州

自古重名器未嘗輕授人煌煌東郡守燦燦兩朱輪父  
祖繼居此恩榮誰與鄰秋風度河水馬足不生塵

送王正仲長官

汴渠汴復沿自可見遲速來時遲有糧去恨速無穀有  
糧安計程無穀不遑宿霜高萬物枯源水縮溪谷黃流  
半泥沙勢淺見蹙澳千里東歸船何日下清瀆澹澹風  
雨寒長汀號鴈驚將投孤戍遙四顧危檣獨彊語慰妻  
孥多虞賴僮僕到家林已收綴樹橘始熟折腰無慙陶  
懷遺馬媿陸我方羨子行送望不移目

解後木芙蓉

託根地雖卑凌霜花亦茂物稟固不遷人情自為陋幸

與時菊開誰嗟發孤秀楚人攀木末已見離騷就

傷驥

驚驥同一轡遲速能幾里當其被問時舉策數耳耳馳  
騁心獨存壓抑頭不起空傳八駭名未遇穆天子

陳丞相燕息園

少仕既勤勞暮節念君息小車辭漢庭緇衣賦衛國廣  
園樹嘉木鳴鳥來野色京水魚可緡東陂鴈可弋豈不  
有秦聲酒酣歌在側寧同扶風人自去北山北

依韻和普上人古琴見贈

獨繭絲為絃九竅珥為軫彈風松颼颼聽水流泯泯欣  
者舉袖舞悲者欲涕隕若此輒動人于時固能準虞舜  
今在上南熏思無盡

依韻和胡舍人見信

西垣閣老號文雄辭體能兼兩漢風絳帳舊生雖授學  
灞陵歸將已無功校文豈論居三上賦分由來本下中  
不恨早朝秋雨急猶陪駕鷺大明宮

題三教圓通堂

處中最靈智人與天地參其間有佛老曷又推為三共  
以圓通出誠明自包含排檻壓文礎煥采塗朱藍而將  
置吾儒復欲籠彼聃二徒不自曉怙若均笑談越鳥不  
巢北代馬不嘶南固亦辨殊土麟鷺唯時堪

設膾示坐客

汴河西引黃河枝黃流未凍鯉魚肥隨鉤出水賣都市  
不惜百錢持與歸我家少婦磨寶刀破鱗奮髻如欲飛

蕭蕭雲葉落盤面粟粟霜菊為縷衣楚橙作麝香出屋  
賓朋競至排入扉呼兒便索沃腥酒倒腸飫腹無相譏  
逡巡餅竭上馬去意氣不說西山薇

杜挺之新得和州將出京遺予薪芻豆

魯公馬病不可出陶令言拙徒叩門舉家食粥焉用怪  
但願漉酒巾常存長安侏儒勝方朔水邊漂母哀王孫  
王孫功名立四極方朔談談干至尊我才不及三子子  
摧藏自媿趨權閭前時永叔寄秉粟一秋已免憂朝昏

今君益之新與救老馬病骨生精魂昨聞新拜歷陽守  
王國久客蝨處禪都水借船輕復淺急起寒汴流渾渾  
耳清眼明見野色一聽江鶴醒若噴餘糧遲鈍不暇惜  
均於朋契惟義惇設如河涸膠在步縣邑亦足供雞豚  
却嗟我甑有時匱莫與太倉黃鼠論

江鄰幾邀食餽餽學書謾成

老飢瘦腹喜食熟況乃十月霜侵膚與君共貧君餉我  
吹壺不學屈大夫前時我膾斫頰鯉滿坐驚睨卒笑呼

誠知舉箸意淺狹一餐豈計有與無

幽廟

老狐依叢祠妖橫起百怪巢臬助鳴聲穴兔資狡獪巫  
紿神靈言俗奏飲食拜三年空禱祈萬疾無愈差臙臊  
日已熾疑畏誰敢懈近者勇丈夫發揭窟乃壞始時驚  
其狂今盡喜其悛尨茸毛尚存獨使尾徒大廟貌更一  
新願以邪為戒

十月十八日



霜梧葉盡枝影疎井上青絲轉轆轤西廂舞娥豔如玉  
東廂賔郎才且都纏頭誰惜萬錢錦映耳自有明月珠  
一為轆轤情不已一為梧桐心不枯此心此情日相近  
卷起飛泉注玉壺

送鄞宰王殿丞

君行問埒結殊物可講解一寸明月腹中有小碧蟹生  
意各騰騰黔角容爰爰願言寬賦刑越俗久疲憊

金陵與張十二傳師賞心亭飲

但嗟識君遲不恨春風惡風惡舟未前置酒共談謔漁歌還浦頭斜日下洲角明朝渡江去相望便成昨

阻風寄刁安國

江風裂瓦鳴浦口驚浪作君駕何不來客心空寂莫

阻風秦淮令狐度支寄酒

春風不獨開春木能蹙浪花高似屋江船百尾泊深灣鐵纜千環繫長軸遠客今朝愁未平主人贈榼飲還足前時共論酒可禁急世救弊且勿速我今正得杯中趣

效陶種秫置心曲

江上遇雷雨

雷從燕尾來雨到江心急挂帆中路時望浦前舟入聲  
喧釜豆裂點疾盎繭立蕩搖魚鼈腥恐懼兒女泣稍聞  
人好語出顧岸已及蘆州有同行言嘻氣吸吸

登瓜步山二首

瓜步山頭廟堂因魏武興亡歸從赤壁事去憶西陵軍  
井藏雲杪林根擁石稜微風認江水細甲幾千層

山上濃雲合江南暴雨來將歸林下嶺中路遇風雷心  
速灣猶遠行遲伴屢催舟師添繫纜兒女望人迴

宛陵集卷三十八

欽定四庫全書

宛陵集卷三十九

宋 梅堯臣 撰

韓子華遺冰

六月侍臣方賜冰我賦得之從友朋開盤一見水玉璞  
置坐百步無青蠅熱膚收汗起疹粟不有消渴同茂陵  
杜子每思赤脚踏韓老嘗苦如甑蒸慙無二公才與學  
享此足與俗輩矜

二十二日起居退聞宣三館諸公觀瑞蓮

來朝十二旒將出未央殿微聞嘉蓮開獨許侍臣見嘉  
蓮其如何層樓擁霞片玉輦下天泉日昃不知倦恩魚  
應亦喜跳沫珠欲濺誰憐與衆歸博士臣疏賤

依韻吳冲卿秋蟲

梧桐葉未老露滴玉井牀秋蟲如里脊促織何苦忙苒  
苒機上絲入夜為鼠傷織婦中夕起投梭重徊徨那聞  
草根聲膏入然肝腸天子固明聖措意如陶唐下民唯  
力穡不見田疇荒豈知裒斂人督責矜健強所以機中

女心鬪日月光年年租稅在聒耳信已常哀哉四海人  
無不由此戕吳侯當聽時靜坐愛初涼方將同佳人歡  
樂舉杯觴錄鳴雜蟻蟻感愴情不皇況蒙朝家恩兄弟  
登俊良意慮宜恤物以慰衆所望今者秋蟲篇不異七  
月章

陌上二女

素手牽蘿羅柔纖明春莢轉盼動桂葉陽語啓瓠犀阿  
姊金盛珠阿妹縑籍圭吹香襲行路豈獨下蔡迷

無悔

婦人未四十容貌已改前男年踰五十嗜慾固自偏勿  
以色敵心色衰心易遷勿以愛恃久愛移久多愆明鏡  
知惡看何須妒嬋娟

弔瑞新和尚

示化何悲戚俱焚只衲衣已隨原火盡空見野雲飛寫  
影誰方丈栽松舊翠微當年渡江盞弟子獨將歸

依韻和吳冲卿新葺南齋



移病新秋厭直廬自將僮僕治前除已栽楚客江邊草  
不學嚴陵瀨上漁紅穗拂欄何蒨粲綠叢無水亦蕭疎  
從今有月君須飲況與朋親共舍居

江鄰幾遷居

聞君遷新居應比舊居好復此假布囊家具何草草我  
貧無囊假來僮笑欲倒所笑還往人生計不足道非用  
僮僕知雖貧自懷寶

聞刁景純侍女瘡已

前時君家飲不見吹笛姬君言彼娉婷病瘥久屢治隔  
日作寒熱經時銷膏脂醫師尤飲食冷滑滯在脾次聞  
有鬼物水火陰以施乃因道士逐實得鬼所為手灑桃  
枝湯足學夏禹馳呵叱出門牆勿復顧嘔遺今雖病且  
已皮骨尚尪羸豈暇理舊曲未能畫蛾眉當期重相見  
風月臨前墀

景純以侍兒病期與原甫月圓為飲

古龍水底鳴素秋江雲不飛江賈愁金陵舊族天祿游

家有善笛能娛侯憶侯前年罷姑熟自買蘄州飽霜竹  
顚肥頂瘦裁青玉鑽鑿商聲五音足牛渚磯邊夜泊時  
平波不起月中吹老魚跳舞龜出泥雌蛟怨泣雄鼉悲  
新還中都人罕知交親奏酒隔簾幃丹脣一發妙響馳  
醉客一見寧非癡昨夜劉郎辭玉卮主人勸謝當勿疑  
渠今纏瘡尚苦羸他日海蟾圓未遲圓未遲凉肝脾畏  
肝熱生腦脂生腦脂不得窺

永濟倉書事

神武立四極收兵銷衆豪輸糧來萬國積庾下千艘貌  
虎肥於豢麒麟老向槽中州無殍餓南土竭脂膏黃鼠  
羣何畏青鳩啄且號古梁生菌耳朽堵出蟭蟧樹腹懸  
蛇蛻絲窠挂鳥毛塵埃雖自汨朱墨亦能操直宿愁風  
雨經年弊褐袍仲尼猶作吏我輩勿為勞

依韻和磁守王幾道屯田暑夜懷寄

地厚天青冥故交榮謝并何當一壺酒以昔相與傾君  
今二千石未往戀山楹山楹夜對月孤懷豈忘情翫者

幾何逝賤者幾何生夏簟且安寢明星上東城

依韻和孫侔鴈蕩二首

海邊巉絕有蒼山怪怪奇奇物象閑百丈素流珠噴薄  
千重紅樹火回環遠尋僧寺石屏下時遇野人雲屋間  
今日京華見君說便思輕舸出東關

鴈蕩高高路莫通銜蘆秋翼入雲峰山頭水闊不見影  
巖下沙平時有蹤千仞柱天何斂閃萬工揮筆漫輕濃  
葛巾蠟屐未能著空羨青蒼重復重

赴刁景純招作將進酒呈同會

日光如鎔金湧上滄海流一朝復一朝鑄出萬古愁大  
鑪石破碎世事安得休明月只照夜時時如屈鉤嫦娥  
與玉兔擣藥何所瘳大患不自治更被蝦蟇偷我思天  
地間二物最取尤措置尚如此細故曷用憂著書欲傳  
道未必如孔丘當時及後代見薄彼耽周功名信難立  
德行徒自脩勞勞於我生蒂挂同贅疣不如聽鄰笛就  
其舉杯甌笛不煩教養酒不煩取求從今醉至春從夏

醉至秋勿禁雞豚魚間薦鵝鴈鳩況多南方物鹹腥美  
咽喉計較無以過試共阮籍謀

薛簡肅夫人挽詞四首

蕭公當賢日小吏引輕軒四德有遺美六親無異言立  
孤傳世嗣垂範在閨門澮水終歸柎秋雲逐去魂

嘗聞求子壻不似怒甘公莫以昔人比皆為當世雄家  
聲新慶續國禮舊恩隆必與齊姜墓千秋壟樹同

冠劍將朝去常知好直言戒辭猶可託先見久應存瑩

白冰兼玉清芬蕙與蓀堂塗從此閑何日卜邱原  
美合周詩播魂先岱嶽歸空堂遷舊榻素月照靈衣珠  
翠香沈匣丹青影挂幃百年親戚淚併作露霏霏

送淮南提刑孫學士

淮南木老霜欲飛順令恐縱諸侯威命書纔出邸掾謁  
已見衣繡車迎歸樂莫我聽筵莫迓清如蟾蜍夜吐暉  
不須久作平反吏自合橫經親帝闈

八月三日詠原甫庭前林檎花



秋蠹無完葉疎叢有瘁莖偶來庭樹下重看露葩榮衆  
自守常理獨開偏見情從今數霜月結子尚能成

送河陽通判張寺丞從富公弼

子諒

張公愛神鏐佩服近玉麟又拭華陰土光彩一以新百  
里無惡獸千里無冤人今朝欲何之土上延平津應當  
出匣飛騰波沒秋旻

送淮南轉運李學士君錫

三都重兵廩命使總八方淮南舟車衝三楚籠利長惟

時有才彥數計等桑羊八月賜詔行朱旆插大航汴湍  
入秋漲東鼓下鐘鏜今日發大梁明朝過睢陽睢陽授  
經地父老認道傍同業八十人或賢或為郎先生歿大  
官弟子無荷囊乃知詩書傳要在明三綱隋末聞仲淹  
來學去佐唐唐初稱名臣鮮及杜與房親見慕義人專  
門起輝光我聞房杜流已顯惟王張雲漢幾萬里星宇  
爭耀芒歸來立螭頭莫愛魚稻鄉

君錫與王伯庸張端明同在睢陽希文講

下

重送楊明叔

并序

行而有以贐者助所不足也車馬子有裘服子有貨具  
子有所可贈者詩言爾故先為七言以送將以道彼美  
而樂乎往也子不為重邀予以規又作五言應其請

君將會稽去舊蹟可以嬉予因狀其美贈子臨路岐子  
不以為樂但願有以規噫吾豈其說畏子未及禪既求  
不語子吾曷忍子欺前年子渡淮夜泊洪澤渚有鬼稱  
使者來告風波期子時再拜謝乃被鄰船嗤逡巡鬼復

至復附船家兒怒彼慢嗤士明當使驚危船兒傍舷迴  
走若一足夔翌日各解舟出浦風動旗子獨乘安流彼  
受橫浪吹此事非子傳焉得他人知昨逢令弟蘊備述  
果不疑越俗素重鬼慎勿啓其私子口有仁義子腹有  
書詩子嘗談王道怪語固未宜近聞蘇才翁問子辟者  
誰得非外戚侯子怒已豎簪今我儻得罪甘與蘇同之

送董傳秀才之汝陰

社燕已歸盡秋鶯猶繞林久為梁國客不起灞陵心徒

步赴朋館遠遊無橐金江君丈人意莫入楚鄉深

鄰幾  
常止

行此

送張子野屯田知渝州

舊居苕溪上久客咸陽東歸來得虎符馳馬向巴中歌  
將聽巴人舞欲教渝童況常善秦聲樂彼渝人風忠州  
自使君竹枝詞頗工行當繼其美貢葛勿怱怱

送楊子充

愈知資陽縣

家近古臨邛聞多木蘭樹其人襲芳馨乃有相如賦成

名三十年始見列鴛鴦出為資陽長秋鬢已點素天子  
愛黔黎歸與蜀民諭當時同洛陽過半作邱墓屈指今  
所存無如君最故唯酒可餞行不飲車空駐

送司馬君實學士通判鄆州

君家世典史君復續祖為蘭臺未成書汶陽從已知將  
行我何贈一誦溪堂詩聞彼多蒲魚可助鼎與庖在昔  
阮嗣宗初赴東平時醉扶乘蹇驢圖畫猶可披今見國  
門外徒馭不驅馳十里馬一歇五里車一脂不得同鴈

羣相送過寒陂

送程殿丞知韶州

從益

韶州使君行請問韶石名傳聞古帝舜石上奏九成鳳  
皇為之下朱鳥不復鳴舊祠亡玉琯四序安得平至今  
南方熱臘月裘服輕事外共廢酒曲江風物清

寄岳州孫屯田

琳

從來洞庭好都在岳陽樓明月一千里寒光三萬秋年  
華有時盡風物不知休太守憐予句應如沈隱侯

大愚

大愚不量能品藻輒已出朝以軻為同暮以丘為匹其  
人豈鷹雀鳩蛤化五日指鹿危二世師歆造新室雖云  
詐力尚終自殞斧鑕

宛陵集卷三十九



欽定四庫全書

宛陵集卷四十

宋 梅堯臣 撰

寧陵阻風雨寄都下親舊

晝夜風不止寒樹噉未休人言雨殺風雨急風未柔獨  
扶慈母喪淚與河水流河水有冬竭淚泉長在眸予生  
五十二再解官居憂昨者母疾亟骨肉相聚愁橐中無  
一錢緩急何可求母當臨終時囑我貧莫羞隨宜具棺  
斂厚貸壓人頭死事定無益生償且無由泣涕聽母言

心腸如剗鉤小子雖不令長養恩曷酬旦夕期速平後  
事勿預謀願母強藥食更延百千秋固云莫望我我魂  
已飛遊語畢忽奄逝撫膺呼裂喉未能一物備迷亂將  
安投艱窘見風義乃有令朋儔致賻或錢帛最力李與  
劉廷老禁省及石渠奠助日不周裴楊乞銘蓋文冢古  
復如晦譚饒兩大艦朝索暮泛浮哀憐荷君子才德  
慙未修三日違大梁兩宿此遲留聊書同些挽試託楚

人謳

新霜感

前日夜上露今日衣上霜我母魂何之膏火糜我腸隔  
棺三寸地如在萬里鄉噉呼不聞聲飲食空置旁昔時  
憂我寒縫衣紉綫長綫長必絮厚要與風霜當又每恐  
我飢羹臠自調嘗此身內外間莫得頃刻忘舉衣不忍  
著舉箸不下吭一念百感生欲問天蒼蒼

過淮

侍親數數來浮汴護櫬迢迢復渡淮旨畜曾無禦寒具

細君唯有隱居釵月痕遠入魚銜浪潮退長汀蚌閣崖  
素服華顛色相似青銅不忍見形骸

淮陰

天下滔滔久厭秦英雄蛇鼠竄荆榛少年豪橫知多少  
不及沙頭一婦人

杪欏樹 李邕有碑

杪欏古樹常占歲在昔曾看北海碑今日四方俱大稔  
不知榮悴向何枝

就野人買兔

霜濃草白兔初肥  
蒼鶻調拳獵犬攜  
刺付錢刀買庖餽  
不須緣徑更求蹄

使風船

清淮直上水連天  
坐看高帆後復前  
自是乘風有遲速  
不由人力愛爭先

淮陰侯廟

韓信未遇時  
忍飢坐垂釣  
歸來淮陰市  
又復逢惡少  
使

之出勝下一市皆大笑龍蛇忽雲騰蛭蟥豈能料亡命  
乃為將出奇還破趙用兵不患多所向孰敢標功名塞  
天地翦刈等蒿藿于今千百年水上見孤廟鷺銜葭下  
魚相呼尚鳴叫高皇四海平有酒不共酌古來稱英雄  
去就可以照

又平律一首

漢家天下將廟古像公主百戰自忘楚一時空王齊鄉  
人奏簫鼓舟子賽豚雞不改寒潮水朝平暮復低

入滿浦

馬頭攬岸斗燕尾泊船齊風送寒潮急雲藏晚日低逢人多楚語問客煮吳雞難覓枚臯宅蒼葭處處迷

許發運待制見過夜話

許公運國儲歲入六百萬上莫究所來下莫有剥怨十年無纖乏功利潛亦建昨除侍從官聊為磨世鈍比於以舌得此豈媿物論較量多少間未足數劉晏大計苟寔費曷不使預算欲倍即能倍但勿惑謗訕擾民可以

奪食官可以竄要付與權衡一切出果斷嗚呼任智力  
長短固有限制財猶制兵太甚則生亂公譬淮陰侯多  
多自益辦我今聽其談夜去為扼腕書之俟米詩咨訪  
不可緩

登秦山日觀峰

并序

予泊瓜步山下夢王景彝問韋應物日觀峰詩予即誦  
知語不屬謂景彝曰當為檢韋集覺而亟閱韋集無此  
題尚記夢中所誦首句云晨登日觀峰遂續補之



晨登日觀峰海水黃金鎔浴出車輪光隨天行無蹤正  
視刺我目攢集如劒鋒照曜萬物興磨滅萬物凶草木  
既無命必聞石間松當時一避雨安得大夫封人而苟  
不遇抱簡誦六龍

重過瓜步山

魏武敗忘歸孤軍處山頂雖憐江上浦鑿巖山巔井豈  
是欲勞兵防患在萌穎我昔常登臨徘徊愛晴景片雨  
西北來風雷變俄頃疾行下危磴屢脫不及整霑濡入

舟中幼子喜抱頸問我適何之衣濕不太冷昨暮泊其  
陽月黑夜正永鴈從沙際鳴旅枕自耿耿平明夾櫓去  
廟樹聳寒嶺舉手生白雲飄搖水中影

發長蘆江口

篙師枕工相整衣龍女廟中來宰豨野祝擊鼓降神語  
老鴉銜肉上樹飛長江無風平似削兩櫓夾舸行將歸  
南國山川都不改傷心慈姥舊時磯

龍女祠祈順風

龍母龍相依風雲隨所變舟人請予往出廟旗脚轉旗  
指西南歸飛帆疾流電長蘆江口發平明白鷺洲前已  
朝膳竹根杯琰不欺人世間然諾空當面

西施

濺濺溪流散苒苒石髮開一朝辭浣紗去上姑蘇臺歌  
舞學未穩越兵俄已來門上子胥目吳人豈不哀層宮  
有麋鹿朱顏為土灰水邊同時伴貧賤猶摘梅食梅莫  
厭酸禍福不我猜

金陵三首

恃險不能久六朝今已亡  
山形象龍虎宮地牧牛羊  
江上鷗無數城中草自長  
臨流邀月飲莫挂一毫芒

金陵逢曉雪撩亂逗雲來  
已失烏衣巷還成白玉臺  
山盤猶隱見江轉似昭回  
一聽高樓笛依稀認落梅

每入秦淮口風波更不憂  
重看後庭樹還起舊時愁  
故老都無有遺蹤莫可求  
何人能識意白鷺在寒洲

了頭石

此碑在金陵斷石岡  
上有吳文帝字焉

了頭石雖斷文字未全訛年算赤烏近書疑黃象多幾  
時經霹靂異代見干戈更與千秋看松煤定費摩

漫書

蒲葵兩錢扇漫寫未嫌輕老嫗持將去無端色不平

閔冢

吳天冊中

盜發廣陵冢及扉開石樞中環走徹道高闊可通車五  
尺銅鑄人執兵冠服朱壁石刻位號列侍幽宮隅殿將  
將軍屬侍郎常侍俱啓棺見其尸鬚斑顏未渝白壁十

雙藉雲母一尺鋪黃金塞耳鼻千歲不腐枯生為貴與  
富死與人未殊後世逢暴禍雖久將焉如堯舜及周孔  
豈不固形軀

雪中發江寧浦至米石

泊舟斫枯葭歎火石岸旁冒鎖雲冥濛漫江雪飛揚拖  
冰修網澀出水朱髻彊曠然起遠懷風旗轉危檣千帆  
共辭浦攬錯逆水翔落星始前瞻瞬目已後相鯢魚何  
時來楊花吹茫茫沙草不可辨鴈立知汀長山頭化石

婦忽變素質光豈復願聞笛莫逢桓野王

登米石山上廣濟寺

船從山下過直上見僧軒  
繫纜登磯石緣崖到寺門  
短籬遮竹瀼危路踏松根  
却看滄江底帆歸烟外昏

效阮步兵一日復一日二首

一日復一日一朝復一昏  
來新去成故俯仰變涼溫  
有貴即有賤未若賤常存  
騁牛慕孤狔黃犬悲東門  
禍福相為基損益不復言  
吾祖入吳市應龍非伏轅

一日復一日一晨復一夕四序相盛衰三辰運光魄下  
上有常理憂患何時易先爛泣金燃先焚歎薪積但願  
遠世網焚爛不能責麒麟出非時未免西狩獲鷗鳥浮  
洪波心已預海客

阻風宿大信口

東梁如印蠶西梁如游魚二山夾大江早暮潮吸噓解  
舟辭姑熟速欲還吾廬風逆未可前泊浦近烟墟波中  
事網罟乘月多夜擘冰灘聚鳴鴈霜葭正疎疎是時昂



畢中曠渺天地虛靜坐人已眠我慮久洗如自起取美酒獨酌邀蟾蜍蟾蜍射白光入盞亦躊躇醉來不解舞欲攬嫦娥祛昔對謫仙人此意復在予既醒裂尺素立作數行書寄與青山家精靈其有諸

早發大信口

犬吠知船解邨墟尚閉門霜泥黏纜尾冰水閣潮痕撇撇鷗鵜去纖纖舴艋昏梅湖到不遠寄信向田園

黃池月下共酌得池字

將歸謝公郡喜見阮家兒但對月和水那能酒似池衰  
形疑鏡照葆鬢怯霜吹宿鴈不堪託鄉人知未知

泊昭亭山下得亭字

雲中峰午午潭上樹亭亭久作大梁客貧留小阮醒灘  
愁江舸澀祠信楚巫靈日暮渡頭立山歌不可聽

送鹽官劉少府古賢

我祖南昌尉時危棄關仙劉郎從宦日天子治平年燥  
茗山中火熬波海上烟吳民不為盜唯此撓君權

太師杜相公篇章真草過人遠甚而特獎後進  
流于詠言輒依韻和

杜詩嘗說少陵豪祖德兼誇翰墨高蘇李為奴令侍席

鍾王北面使持毫

子美祖審言嘗自謂我詩可使蘇李為奴我書可使鍾王北面郊麟

作瑞唯逢趾天馬能行不辨毛一誦東山零雨句無心

更學楚離騷

依韻和僉判都官昭亭謝雨迴廣教見懷

賽雨何從事高情苦愛山謝公聯句後

謝公有昭亭賽雨與何從事聯

詩句  
惠遠過溪間笑處巖相荅歸時酒在顏端憂守窮巷  
無力共躋攀

依韻和吳正仲屯田重臺梅花詩

桃花已滿秦人洞杏樹猶存董奉祠莫怪寒梅獨多葉  
只緣樂府有新詩

讀吳正仲重臺梅花詩

此樹在靈濟王廟

楚梅何多葉縹蒂攢瓊瑰常惜歲景盡每先春風開龍  
沙雪為友青女霜作媒託根邇廟堂結子助鼎鼐吳侯

本吳人筆力高崔嵬但詠同姓木予非梁棟材

依韻和正仲重臺梅花

芳梅何萋萋素葉吐層層近臘寒猶勁先春氣已承冷  
香傳去遠靜豔密還增有意常欺雪無功合鏤冰早烟  
籠玉暖凍雨浴脂凝漢女新妝薄燕姬瘦骨稜壓枝唯  
恐折簇萼似難勝神物終來護江鄉未解矜獨竒心豈  
欲寄遠客何曾不見黃鸝度寧防粉蝶凌月光臨更好  
溪水照偏能画軸開雲霧宮刀翦絳繒都無筆可銜莫

信巧堪憑丹杏塵多雜天桃俗所稱故林嘗渴望大庾  
更愁登重和陽春曲聲辭猥媿仍

正仲見贈依韻和答

平生好書詩一意在抱慙既無缺雲翽身世遭黜黜恥  
游公相門甘自守恬淡妻孥每寒飢內媿劇剗憚時賴  
二三友乞米慰窮慘雖然情懷惡亦未廢誦覽如負會  
稽辱欲雪效嘗膽作文持與人百不得一領聖猶嗜好  
殊獨取菖蒲歎我愚希六義將使鬼神感譬彼捕長鯨

區區只持罽青天挂虹霓踴跂不可攀太華五千仞妄  
學巨靈撼幸且同蛙黽近樂在井坎蒼髮況種種存非  
衛髦髡吳侯琅玕姿而來視亂莢鳳皇五色毛曷羨未  
翅蝻染夏有正米安用此淺黠乃知叔度陂萬頃見澄  
澹孟軻患為師薄劣亦何敢

正仲往靈濟廟觀重臺梅

玉盤疊捧溪女歸魚鱗作室待水排竹間山鬼入夜啼  
古廟久閉誰啓扉屈原憔悴江之沂芙蓉木蘭託興微

賈誼未召絳灌擠香草嘉禾徒菲菲曾無半辭助訶譏  
國風幸賴相因依

依韻和昭亭山廣教院文鑑大士喜予往還

山暖春烟重林昏古寺藏溪流過曉漲嶺樹見新行馬  
去侵雲蹟風來襲野芳禪衣頻斗數蠟屐莫趨蹌飛鼠  
時過擲飢禽或下頰憑闌何所適望堞正相當捧膳溪  
童潔銜花鹿女香登臨無險絕不似畏巖牆

依韻荅達觀禪師穎公



霜露每懷感江山空復情老便林室靜坐厭巷童聲盡  
日都無語逢人亦強吟浮生過半百安用此虛名

題姑蘇邵氏園居

積水夫差國閒居魯叟心石科雲氣潤城角竹連陰燕  
入池塘晚花開島嶼深應當效疎傳不惜橐中金

嘗正仲所遺醪醕

屈原自著漁父篇鋪糟不及漁父賢世無功名多浪死  
劉伶阮籍于今傳邇來獨酌邀明月唯有青山李謫仙

謫仙歿後幾百年市樓日沽千萬錢沉酒豈少當道眠  
文字不見空月圓吳均之孫何我憐雙壺貯醅持置前  
豈乏阮李詩與瘡淺飲強對春風妍

依韻和正仲寄酒因戲之

上字黃封誰可識偷傳王氏法應真清淮始變醅猶薄  
句水新來味更醇欲擬比酥酥少色曾持勸客客何人  
紅梅雖是吾家物老去無心一醉春

清淮酒本王九  
傳法於山陽

春雨


春雨霽霽鳴百舌  
林花淡淡洗燕脂  
眼前耳底催人殺  
不醉三杯大是癡

春夜聞雨

風味正不寢驟來寒氣增  
簷斜滴野籜牕缺搖春燈  
孺子睡中語婦人行未能  
前溪波暗長定已沒灘稜

早春田行

風雪雙羊路梅花溪上邨  
鳥呼知木暖雲濕覺山昏  
婦子來陂下囊壺置樹根  
予非陶靖節老去愛田園



宛陵集卷四十